

**МОНГОЛ УЛСЫН ЭЗЭН ХААН БОГД ЖАВЗАНДАМБА
ХУТАГТААС ЯПОН УЛСЫН ЦОГ ЖАВХЛАНТ ЭРХЭМСЭГ
ЭЗЭН ХААНД ИЛГЭЭСЭН ЗАХИДАЛ, ТҮҮНИЙ МӨРӨӨР
МӨШГИХҮЙ**

*О.Батсайхан**

(ЭХЛЭЛ НЬ ӨМНӨХ ДУГААРТ)

Strictly confidential

Gists of some political statements made by Mr.Kodama to the Mongolian Ministers at Urga.

It seems desirable that the Mongolian Princes should be duly advised on the necessity of uniting all Mongols as well in Inner as in Outer Mongolia, - this being the vital condition for their political regeneration. If letters would be sent to some of the Princes namely to the hoshuns of Bairan, Charud, Aro-Karachin and Oug-nut, Mr.Kodama is prepared to forward such letters to the addressees.

Owing to the good relations existing now between Russia and Japan, the latter is not inclined to contrary the Russian wishes. Therefore the Da lama, on his arrival to Harbin, could not proceed further and was not received by the Japanese authorities. Nevertheless Japan, although she was tied by the rules of international intercourse, will never forget the good intentions towards her of the Da lama and the latter's mission – unfulfilled as it remained – still produced a good moral effect and surely shall bring good results in future.

To ask anybody's friendship or protection without offering some compensation is not a sound policy. Japan has not the intention to make territorial acquisitions in Inner Mongolia; her object there is the construction of a railway for the development of her commercial interest. Practically the land in that region is owned either by Mongols or by Chinese which fact is well known to Japan and the construction of the said railway can in no case mean any territorial encroachments from the part of the Japanese. Friendly proposals of the Mongolian Government on this subject would be readily taken in consideration by Japan. Japan shall surely obtain the right to construct the above mentioned railway from the Chinese Government but in such case Japan will be obliged to back China to the detriment of Mongolia, as the Chinese should then be able to increase the number of their troops in Inner Mongolia. This point is so much the more important as the attack of Outer Mongolia is planned by the Chinese in the north west direction from Taonanfu. On the contrary Japan having its special interest

*О.Батсайхан - ОУСХ-ийн эрдэм шинжилгээний тэргүүлэх ажилтан, доктор (Sc.D), профессор

in Inner Mongolia and opposing the despatch of Chinese troops to that region, it shall not be easy for China to insist and to enforce in practice such a measure. (p.732)

Хутагтын захидал хэмээн нэрлэгдээд байгаа Монгол улсын эзэн хаан Богдоос Япон улсын Эзэн хаанд хаягласан, Орос, Японы гадаад харилцааны дипломатуудыг сүрхий сандралд оруулсан тэрхүү захидлын цаашдын хувь заяаны талаар мөшгин үзэх аваас үнэхээр сонирхолтой ажээ.

1914 оны 2 дугаар сарын 20-ны өдөр Япон улсаас Орос улсад суугаа элчин сайд Мотоногоос Япон улсын Гадаад явдлын яамны сайд Макинод явуулсан захидал байх бөгөөд (уг захидлыг 3 дугаар сарын 11-ны өдөр хүлээн авсан гэж тэмдэглэжээ –О.Б) түүнд өгүүлэхдээ “Элчин сайд Мотоно Япон улсын Гадаад явдлын яамны сайд Макинод мэдүүлэх нь Энэ хэргийн (Богдын захидлын тухай хэлж буй –О.Б) тухай 1 дүгээр сарын 29-ны өдөр ирүүлсэн таны захидалд Хутагтын захидал гэгчийг битүүмжилсэн хэвээрээ Токиод суугаа Орос улсын Элчин сайдал буцаалаа гэжээ. Агуулга нь үл мэдэх байдалтай тул манай газарт суугаа Осакагийн өдөр тутмын сонины сурвалжлагч Фүсэ Кацужид Монголын төлөөлөгчдөөс үзүүлсэн тус захидлын нооргийн орос орчуулгыг тус хүнээс олж авлаа. Үүнд орчуулгыг хавсарган Таньд илгээв” гэжээ.

Үнэхээр Японы тал Оросын хардлагаас болгоомжилсон байж болох талтай Хутагтын захидлын агуулга Японы талд сонин байсан бизээ. Харин Богдын нэрээр хаягласан Монголын эл захидал дотор Кодамагийн тухай өгүүлсэн нь бага зэргийн алдаа болсон байж болох боловч уг захидал нь Кодамагийн айлчлалаас үүдэлтэй биш байх хэмээн санана. Учир нь Монголын Засгийн газрын төлөөлөгчид Англи, Франц, Япон зэрэг таван улсын Эзэн хаанд өргөн барих захидал авч явсан тул уг захидлыг тийнхүү “Кодамагийн айлчлалаас үүдэлтэй” хэмээн үзэх нь арай гоомой болох болов уу хэмээн санана. Үүний учирьг Богдын захидлын дотор дурьдагдаж буй Монголын талаас удаа дараа Японы эзэн хаанд хандсан байдлаас харсан ч ойлгогдох болов уу гэж санана. Монгол улсын эзэн хаан Богд хааны Япон улсын эзэн хаанд хаягласан захидлын бүрэн бус монгол эх Монгол Улсын архивт буй билээ. Харин уг захидлын орос орчуулга буюу Монголын Ерөнхий сайд Намнансүрэнгийн Хаант Оросын Гадаад явдлын яамны сайд Сазановт барьсан бичиг дотор “уул бичгийн эхийг ёсоор сийрүүлэн орос үсгээр орчуулан хүргүүлсэн” хэмээн дурьдагдсанчлан Богд хааны захидлын орос орчуулга⁷ Японоос Орост сууж байсан элчин сайд Мотоно сангаар дамжин Японы Гадаад харилцааны яамны сайд Катод хүрсэн байна. Ийнхүү Богдын захидал орос хэлнээс япон хэл дээр хөрвүүлэгдэн эдүгээ хүртэл Япон улсын Гадаад харилцааны яамны архивт хадгалагдсаар байна. Одоогоос 92 жилийн өмнө Монгол улсын эзэн Хаан Богд

Жавзандамбаас Япон улсын эзэн хаанд хандаж бичсэн уг захидлын агуулгыг Монгол Улсын Үндэсний архивт хадгалагдан буй бүрэн бус монгол эх, Японы гадаад явдлын яамны архивт буй япон эх (Японы Тохокугийн их сургуулийн профессор, монголч эрдэмтэн Ока Хироки гуай монголчилж өгөв-О.Б), орос хэл дээр тухайн үедээ орчуулж, хожим уг байдлаараа хадгалагдан үлдсэн орос эхийг харьцуулан байж аль болох бүрнээр тодруулахыг оролдов.

“Монгол улсын эзэн хаан хичээнгүйлэн

Их Жибин улсын эзэн хаан таны амгаланг эрмүй.

Мөнөөхөн уржнан өвөл Монголчууд бид нийт бүхнээр эртнээс тогтносоор ирсэн өөрийн газар орон ба шажин суртаал ёс журмыг алдагдах үгүйгээр сахих учир Чин улсаас салаад өөртөөн тогтнож, өөрөө эзэрхэх улс төр байгуулсан тухай дор мөхөс улсын Засгийн хэрэг шийтгэх газраас (миний Засгийн газар гэж буй – Япон орчуулгад) гэрээ байгуулан, худалдаа нэвтрүүлж, улсын найрамдлыг зузаатгахыг эрж, эрхэм улсын Засгийн хэрэг шийтгэх газар мэдэгдэн явуулсан нь, зөвшөөрөн хүлээсэн хариу бичгийг хараахан хүлээн аваагүй бас ноднин өвөл цаг тусгайлан (япон эхэд миний –О.Б) Дотоод яамны эрхэлсэн сайд чин ван лам Цэ (Да лам Цэрэнчимэдийг хэлж буй –О.Б) нарыг томилон улсыг бичгийг хичээн өргөж, хичээнгүйлэн их хаан таны амгаланг эрхээр илгээсэн боловч зам үл нэвтрэх учир зуураас эгж иржээ. (Эдүгээ бас Бүгд ерөнхийлэн захирах сайд номун эзэн Сайн ноён хан На нарыг томилон- эдгээр үгс япон орчуулга болон орос орчуулгад байхгүй байна - О.Б) улсын бичгийг хичээн өргөж хичээнгүйлэн их хаан таны амгаланг эрж, хоёр улсын үүрд сайнаар найрамдаллан ард хүмүнээр урт даган энх түвшнээр жаргахыг хариу илтгэхийг хүсэж илгээвэй.

Олдвоос хүргэсэн цагт зөвшөөрөн хүлээн авах ажаам уу.

Жич хичээнгүйлэн айлтгах нь

Мөхөс улсын өөртөө тогтнох өөрөө эзэрхэхийг Орос улс зах нийлэн он удсан айлын (энэ хүртэлх үгс Монгол улсын Үндэсний төв архивт буй ажээ. Харин үүнээс хойш архивт бүтэн үлдээгүй хэсгийг япон болон орос орчуулгыг харьцуулан үзэж монгол хэл дээр зохиосон уг эхийг сэргээхийг хичээлээ –О.Б) ёсоор хүлээн зөвшөөрсөн бөгөөд тус улс манай улсын хооронд гэрээ ба худалдааны гэрээг байгуулсан болохыг Танд хичээнгүйлэн айлтгамай.

Манай Өвөр Монгол болбоос Хятадтай хил залгаа орших бөгөөд маш их хохирол амссаар буй. Эдүгээ Хятадын цэрэг Өвөр Монголын нутагт түрэмгийлэн орж, (япон орчуулгад - эх оронд буцах замд) сүм хийдийг түймэрдэн устгаж хөгшин нялхас, эр эмийг ялгалгүй алан хядаж эд хөрөнгө малыг тонон дээрэмдэж буй. Учир иймд Монголчуудын ихэнх

нь (орос эхэд - хүчинд автан) нүүрэн дээрээ Дундад улсад даган орохыг зөвшөөрөвч далдуур тасралтгүй бидэнд сахин хамгаалахыг хүсч баймой. Үүнд мөхөс манай засгийн газар өшөөт дайсныг сөнөөхийн төлөө олон замаар цэргээ хөдөлгөжээ. Харин хурц зэвсэг хараахан үлэмж үгүй дор зах хязгаарыг бүрэн бүтэн батлан хамгаалж чадаагүй байна.

Мөнөөхөн эрхэм улсын түшмэл Кодама Хүрээнд ирэхэд манай (япон эхэд – миний) засгийн газраас тус түшмэлд Япон, Монгол хоёр улсын хооронд найрсаг харилцааг тогтоон, эрхэм улс бээр Өвөр Монголд төмөр зам тавих эрхээ олж үүгээр Хятадын цэрэг Өвөр Монголын нутагт цөмрөн орох замыг хаах хүслийг дурьдсан билээ. Үүнд тус түшмэлээс бидний хүслийг өөрийн засгийн газарт уламжлахыг амлажээ. Тиймийн тул энд би Эрхэм хаан танд шударга журмын төлөө тусламж олгохоос татгалзахгүй, соёрхвоос Хятадын засгийн газарт хүчлэн ухуулж, Өвөр Монголын нутгийн дотор тэдний цэргийг оруулахыг зогсоож, бидний Ар, Өвөр Монгол овогтон эртнээс бүгдээр нийлэлдэн үндсийг (орос эхэд - үндэс, шашин гэж буй О.Б) бүрэн бүтэн болгох хэмээсэн бидний эрмэлзлэлд туслахыг гуймой.

Уг нь манай мөхөс улсаас урьдаар бүрэн эрхт элчийг томилон илгээх нь зүй боловч замдаа саатан зорьсондоо хүрч чадаагүй бөгөөд шударга журмын үйлийг завсардуулахыг үл хүсэх тул би Эрхэм хаан танд хүсэх нь олдвоос байцаан толилж, таны засгийн газарт зарлиг буулгаж бүрэн эрхт элчийг манай улсад томилон илгээж тус элчээр манай улс байгуулах ажилд туслуулан хоёр улсын хоорондын үүрдийн найрсаг харилцааг бататгах ажаам уу. Буурай улсын эзэн би олон түшмэл, сайд, шар, хар бүгдээр сүслэн биширч үүнийг угтан хоорондын найрамдлыг улам зузаатгахаар чармайн зүтгэвэл зохимой.

Үүний тул би бээр Эрхэм хаан таныг хүндэтгэн миний гуйсан (орос эхэд -хүсэлтийг) (япон эхэд – явдлыг) соёрхолдоо багтаан авч хариу шагнахыг хүсмүй. Үүний тул Монгол улсын хаан Жавзандамба ёслол. Олноо өргөгдсөний гутгаар он Өвлийн эхэн сарын арван еснөө Нийслэл Хүрээнээ бичив” хэмээжээ.

Богд хааны Японы эзэн хаанд өргөн барьсан захидлын бүрэн бус монгол эх Монгол улсын Үндэсний төв архивт буй. Тэрхүү Богдын захидлын монгол эхийг Сайн ноён хан Намнансүрэн нар Орос улсаас Нийслэл Хүрээнээ эгж ирэхдээ авч ирсэн байна. Архивын сурвалжид тэмдэглэгдснээр “Шавь боол На, У, Цэ, Чи сөгдөж хичээнгүйлэн айлтгах нь:

- Шавь боолчууд Зарлигийг дагаж Орос улсад зарагдан одож тушаалын хэрэг дуусч Нийслэл Хүрээнээ ирж, Дээрхийн гэгээнээ бараалхан мөргөсөн зэрэг явдлыг хичээнгүйлэн нугалбар бичиж”⁸ айлтгахдаа “Их Орос улсын хаан эзний амгаланг эрж улсын бичиг бэлэг ба эрдэнийн очирьг өргөн барьж гүйцэтгэн басхүү тэдний засгийн газар

лугаа улсын хэргийг удаа дараа хэлэлцсэн ба бичиг өгсөн бас ч улс төрийн чухал зүйл учирьг тодорхойлон өөрийн саналыг илтгэж олон улсын элчин сайдад бичиг өгсөн” зэрэг явдлыг тодорхой дүрслэн бичээд “Их Орос улсын гадаад хэргийн яам ба Ин, Фа зэрэг олон улсын элчин сайдуудад өгсөн бичгийн эхийг сийрүүлэн бичсэн данс нэгэн дэвтэр мөнхүү Орос улсын Гадаадын хэргийн яам жич Хятад улсын зэрэг олон улсын элчин сайдаас хариу өгсөн Орос, Хятад үсгийн бичиг, Ин,⁹ Фа¹⁰ зэрэг таван улсын хаан эзнээ өргөх хэмээсэн улсын бичиг таван дугтуй, басхүү Их Орос улсын түшмэл Козинг Сангийн яамнаа авах учир тогтоосон гэрээ бичиг нэг, бас аливаа явсан хэлэлцсэн хийсэн хэргүүдийг өдөр дараалан тэмдэглэсэн данс нэгэн дэвтэр, басхүү Их Орос улсын зэрэг гадаад улсын сайдууд түшмэдэд эрдэнийн очир шагнасаньг сийрүүлэн тэмдэглэсэн данс нэгийн хамтаар” толилуулахад бэлтгэж бүрнээ хуучин удаагаар Бүгд ерөнхийлэн захирах яамнаа шилжүүлэхээр айлтгаад Богдоос “зарлиг мэдэв” хэмээн улаан бийрээр цохьсоны дагуу мөн өдөр уг зүйлсийг дагалдах бичгийн хамт холбогдох яамдад хүргүүлсэн хэмээн архивын сурвалжид тэмдэглэгдэн үлджээ.

Энэхүү айлтгал дотор дурьдагдан буй “Ин, Фа зэрэг таван улсын хаан эзнээ өргөх хэмээсэн улсын бичиг таван дугтуй” хэмээсэн нь Англи, Франц, Япон зэрэг орны эзэн хаадад өргөх хэмээсэн захидлууд даруй мөн буй за хэмээн бодно. Гадаад улсын хаан эзнээ өргөх хэмээсэн улсын бичиг нь эрхбиш улсын хааны нэрээр бичигдсэн байх учиртай. Харин Богдын эдгээр захидлын эх бичгүүдийн талаар тэр бүр бичихгүй буюу бид судалгаандаа орхигдуулах явдал гарсаар байна. Үүнийг бага боловч нөхөх үүднээс Япон улсын архивт хадгалагдан буй Богдын захидлын орос орчуулгаар дамжсан япон хэл дээрх эхийг Монгол Улсын архивт буй Богд хааны Япон улсын эзэн хаанд илгээсэн захидлын бүрэн бус монгол эх болон Зөвлөлт Холбоот Улсын “Красный архив” сэтгүүлийн 1929 оны дугаар 6-д хэвлэгдсэн “Перевод письма Ургинского Хутухты на имя Японского императора” гэсэн гарчиг бүхий орос эхтэй харьцуулан байж, Богд хаанаас Японы эзэн хаанд хаягласан захидлын монгол эхийг сэргээхийг хичээлээ.

Дээр дурьдсан захидлуудын агуулга үндсэндээ тохирч байгаа боловч Богд хааны захидлын бүрэн бус монгол эхэд “Сайн ноён хан Намнансүрэн нарыг томилон” гэсэн үгс байгаа бол эдгээр үгс орос болон япон эхэд байхгүй байна.

Богд хааны захидлын агуулгыг тодруулан үзэх аваас юуны өмнө Монгол улс Япон улсын хооронд найрсаг харилцаа тогтоох, эдийн засгийн хамтын ажиллагаа хөгжүүлэх, өөрийн орны тусгаар тогтнолыг бэхжүүлэхэд Япон улсаас тусламжыг олох хэмээсэн санаа тод харагдаж буйн зэрэгцээ Өвөр Монголын талаар ихэд санаа тавьсан нь илт байх

бөгөөд магадгүй Өвөр Монголыг Японы ивээл дор оруулах нь Хятадын гараас мултрах нэг арга хэмээн үзэж байсан ч байж болох юм хэмээн бодож байна. Японы эзэн хаанд Богд хааны нэрээр явуулсан захидалд Монголын талаас 1911 онд тусгаар тогтнолоо тунхагласнаас хойш ийнхүү 3 дахь удаагаа хандаж буйгаа ч дурьдсан буй нь Монгол улсаас үнэхээр Япон улстай харилцаа тогтоох чин эрмэлзэлтэй буйгаа илтгэн харуулсан хэрэг буй за. Нөгөө талаас Өвөр Монголын асуудлыг ийнхүү Японд хандан тавьдаг нь Орос, Японы гэрээний цаад агуулгыг гадарлаж байсан хэмээлтэй байна. Учир нь Монголын төлөөлөгчид Орост очсоны дараа Өвөр Монголын асуудлыг эхлээд Оросуудад хандан тавьсан боловч дараа нь бас Японд хандан эл талаар хүсэлт илэрхийлж буй нь тухайн үеийн олон улсын байдал хийгээд дэлхийн томоохон гүрнүүд болох Орос, Япон хоёрын гадаад бодлогоос Монголын байдал ихээр хамаарч байсан болохыг мэдэрч байсан хэрэг хэмээн бодно.

Харин захидлын дотор Кодама хэмээгчийн тухай өгүүлсэн нь бага зэргийн алдаа болсон байж болох юм, гэхдээ уг Кодама хэмээгч өөрөө их зүйл амалж, Японы Засгийн газрын төлөөний түшмэл байж болзошгүй гэсэн сэтгэгдэл Монголын Засгийн газрын түшмэдэд төрүүлсэнтэй холбоотой байх. Үүнийг Японы Засгийн газар шалтаг болгосон болохоос бус үнэндээ Кодама хэмээгчийг дурьдсанаас Богдын захидлыг эзэн хаандаа өргөхөд бэрхшээлтэй хэмээн үзээгүй байх. Хэргийн учир нь Оросын хардлагаас болгоомжилсонтой холбоотой байж болох юм. Монголчууд үүнийг сайтар тооцоолсоны үндсэн дээр уг захидлыг Оросын Гадаад харилцааны ямаар дамжуулан Япон Засгийн газарт хүргүүлсэн хэмээн үзүүштэй санагдана.

Гэвч асуудлын мөн чанар юунд байна вэ гэхээр 1910-аад оны үеэс Японоос Монголын асуудлыг маш ихээр сонирхон судалж өөрийн анхааралд байлгаж байсан боловч яагаад уг асуудалд ингэж хандах болсон бэ гэдэгт буй юм. Богдын захидлын агуулга хийгээд Да Лам Цэрэнчимэдийн Японд очих гэсэн чин эрмэлзлэл, Сайн ноён хан Намнансүрэнгийн Японы Засгийн газарт ирүүлсэн бичиг бүгдийг Японы Засгийн газар, Гадаад яам сайтар мэдэж байсан төдийгүй, бараг цаг хугацаа алдахгүйгээр Монголын үйл явдлын талаар мэдээлэл авч байсан нь хүртэл эдүгээ Японы архивт буй материалаас харагдаж байна. Японы Засгийн газраас Монголын талаар ийм хоёрдмол бодлого баримтлахад хүргэсэн зүйлс юу байсан талаар цаашид нарийвчлан судлуулштай хэмээн бодож байна. Ихэнх судлаачид Богдын Японы эзэн хаанд хаягласан захидлыг задалж уншилгүйгээр Японы Гадаад явдлын яамны сайд Макино буцаалаа хэмээн үзээд уг асуудлыг дуусгавар болгосон байдаг билээ. Миний бодоход эл асуудал үүгээр дууссангүй. Учир юун хэмээвээс Японы Засгийн газар Богдын захидал ирэхээс өмнө ч тэр ирсний дараа ч тэр

Монголын асуудлыг маш идэвхтэйгээр сонирхон судалж байсан билээ. Тэр ч бүү хэл энэхүү Хутагтын захидлын мөрөөр Японы Засгийн газар нэг хэсэг хугацаанд нилээд ажиллагаа явуулсан байна. Энэ талаар дор өгүүлэх баримт бичгүүдээс маш тодорхой харагдах болно. Мөн түүнчлэн Богдын захидал гэж нэрлэнэ үү, Хутагтын захидал гэж нэрлэнэ үү аль нь байснаас үл хамааран ямар ч гэсэн Монголын тухай асуудлыг 1914 оны эхний хагаст дэлхийн томоохон гүрнүүд болох Англи, Америк, Франц, Герман улсуудын парламент болон Засгийн газар тодорхой хэмжээнд авч хэлэлцэхэд хүрсэн явдал бол тухайн үеийн монголчуудаас дэлхийн олон нийтэд хандаж явуулсан гадаад бодлогын тодорхой үр дүн мөн хэмээн үзэж байна. Монгол улсын Богд тэргүүтэй Засгийн газраас авч хэрэгжүүлсэн эдгээр арга хэмжээний мөрөөр аль улс хэрхэн хандаж буй талаар Японы Засгийн газар, түүний Гадаад явдлын яам ихэд шимтэн сонирхож, дипломат шугамаар маш нууц байдлаар нилээд үйл ажиллагаа явуулсныг хийгээд Монголын талаарх дотоод, гадаад аливаа мэдээллийг цаг алдалгүй авч байсныг маш анхааралтай судалж үзүүштэй санагдсаныг нуух юун. Хятадын Засгийн газар Монголын Засгийн газраас Хятад дахь гадаадын улс гүрнүүдийн консул нарт хандан бичсэн захидлын талаар 6 дугаар сарын 6-ны өдөр сониноос олж мэдсэн байхад түүнээс гурав хоногийн өмнө буюу 6 дугаар сарын 3-ны өдөр Японы Засгийн газар энэ талаарх мэдээллийг өөрийн гарт оруулсан байдаг билээ. Мөн түүнчлэн Нийслэл Хүрээнээс Монголын Засгийн газрын захидал Хятадад суугаа гадаадын улсуудын консул нарт хэрхэн очсон талаар Хятадын тал сониноос мэдүүт уг захидлын мөрөөр гадаадын консул нараас мөрдөж лавласан¹¹ байна. Энэ талаар эрдэмтэн Наками өөрийн бүтээлдээ тэмдэглэжээ. Түүний тэмдэглэснээр Хятадын албаныхны асуултад Америкийн консул “Тэр захидал ирсэн бөгөөд түүний агуулга нь сонинд хэвлэгдсэнтэй нийцэж байгаа, энэ нь албан ёсны бичиг бөгөөд дээр нь Богдын тамгатай бөгөөд англи орчуулгатай хавсаргасан байна” гээд харин “хаанаас ямар шугамаар ирсэн бэ” гэсэн асуултад “томилогдсон хүн авчирч өгсөн” гээд захидлыг өгсөн хүний тухай хэлээгүй байна. Харин Английн консул “Харбинаас Монгол, Түвдийн хорооны нэгэн ажилтанд уг захидлууд хүргэгдэж, улмаар тэрбээр Англи, Америк, Герман, Франц улсуудын консулт хүрсэн” болохыг хэлсэн байна. Тэрхүү Монгол, Түвдийн хорооны ажилтан бол Лан хэмээх бөгөөд Хятадад дургүй хүн тул монголчууд түүнд итгэж захидлыг түүгээр дамжуулсан хэрэг ажээ. Японы Эзэн хаанд хаягласан, эзэндээ хүрээгүй битүүмжлэгдсэн хэвээрээ буцсан Богдын захидал хэмээхийн агуулга нь Япон улс төдийгүй дэлхийн улс гүрнүүдийн хэмжээнд хэлэлцэгдсэн явдал нь Монголчуудын түүхэнд сонирхол татахуйц содон үйл явдал болсон хэрэг мөн буй за.

Ийнхүү 1911 онд тусгаар тогтнолоо сэргээн тунхагласан Монгол улсын Засгийн газрын гадаадын үйл ажиллагаа хэрхэн өрнөсөн хийгээд тэр талаар дэлхийн улс гүрнүүд хэрхэн үзэж байсныг Япон улсын Гадаад харилцааны түүхэнд холбогдох баримт бичгүүдээс дор толилууллаа.

Юуны өмнө Японы Гадаад харилцааны сайд Оросын элчин сайд дугаа уулзаж, Богд хаанаас Японы эзэн хаанд өргөн барьсан захидлын талаар ярилцсан ярианыхаа агуулгыг маш тодорхой бичиж, Хаант Орос болон Хятадад суугаа өөрийн улсын төлөөлөгчиддөө мэдээлжээ.

Баримт түшиж үзвээс, Японы гадаад харилцааны баримт бичгийн эмхтгэлд 508 дугаартай орсон баримт болбоос Японы Гадаад явдлын яамны сайд Катогоос Монголын Засгийн газрын захидлын талаар мөшигж үзэхийг өөрийн элчид даалгасан бичиг болой.

6 дугаар сарын 10-ны өдөр Японы Гадаад явдлын яамны сайд Катогоос Хятадад суугаа Консулын хэргийг түр хамаарсан Обатад явуулсан бичиг

6 дугаар сарын 4-ны өдрийн Таны цахилгаан мэдээ 431 тоотоор

Энэ удаа Монголын Засгийн газраас 4 улсын консулын яаманд тавьсан асуудал нь энэ жил 3 дугаар сарын 18-ны өдрийн 72 тоот бичгээр орчуулгыг явуулсан Эзэн хаанд хаягласан Хутагтын захидлын агуулгатай адил хэмээн таамагламой.

Тэгэхдээ та бээр боломжтой цагт тус дөрвөн улсын консулаас түүний агуулгын юу болохыг болон энэ асуудлын хариуд тус улсуудын Засгийн газар буюу Консул нар ямар арга хэмжээ авах гэж байна эсвэл авсан тухай асуугаад асуусан дүнгээ надад мэдэгдэнэ үү.

Баримт бичгийн дугаар 509

6 дугаар сарын 11-ны өдөр Гадаад явдлын яамны сайд Катогоос

Англи улсад суугаа Элчин сайд Иноуэ

Франц улсад суугаа Элчин сайд Иши

Герман улсад суугаа Элчин сайд Сугимура

Америк улсад суугаа Элчин сайд Чинда нарт явуулсан бичиг

6 дугаар сарын 4 ны өдөр Хамаарсан консул Мацударигаас мэдэгдсэн нь

Хэдхэн өдрийн өмнө Хятадад суугаа Англи, Франц, Америк, Герман дөрвөн улсын Консулын яаманд Монголын Засгийн газраас захидал ирүүлжээ.

Тус захидлын дотор Монгол болбоос тусгаар тогтнож, мөнөөхөн Орос улстай худалдааны гэрээ байгуулсан тул бусад улсуудтай нэгэн адил худалдааны гэрээ байгуулахыг хүсжээ. Тиймээс тус улсуудаас хэлэлцээ хийх эрх бүхий консулыг Өргөөд томилон ирүүлэхийг хүснэ

хэмээн тэмдэглэсэн байгаа тухай Бээжинд суугаа Мичисуки сурвалжлагчийн мэдээг авлаа. Тиймээс Орос улсын хамаарсан консулаас лавласанд тус хамаарсан консул нь энэ асуусан хэрэг байсныг зөвшөөрсөн тухай цахилгаан мэдээгээр мэдэгдлээ. Үүнд энэ жилийн 1 дүгээр сарын 14-ны өдөр манай улсад суугаа Орос улсын элчин сайд Сайд Макинод морилон ирж, тухайн үед Оросын нийслэлд байсан Монголын төлөөлөгчдөөс дэвшүүлсэн төлөвтэй Хутагтаас Эзэн хаанд хаягласан захидал 1 хувь (битүүмжилсэн бөгөөд агуулгыг үл мэднэ) өгч, Орос улсын Засгийн газрын зааврын дагуу өргөн барихыг хүсчээ. Бас энэ захидлыг өргөн барьж ирүүлэхэд хүрсэн нь Өвөр Манжийн төмөр замын ажилтан Кодама гэгчийн Хүрээний Засгийн газрынхантай уулзаж, ярилцсан дүн мөн хэмээн дурьдсан байна. Сайд Макино үүнд Гадаад Монгол болбоос Эзэнт гүрэнтэй ямар ч дипломат харилцаа үгүй бөгөөд түүний эзэн болох Хутагтаас ялангуяа Эзэнт гүрний заавраар явсан биш байдгаар барахгүй, Эзэнт гүрний Засгийн газар нь Хүрээнд очсоныг ч мэдээгүй Кодама мэтийн хүний яриаг үндэслэн ирүүлсэн захидлыг Эзэн хаанд өргөн барих бололцоогүй хэмээн яриад тус захидлыг буцааж өгсөн байна. Дараа нь 2 дугаар сард Оросын нийслэлд суугаа Осака өдөр тутмын сонины сурвалжлагч Монголын төлөөлөгчдөөс үзүүлсэн хэмээн дээр тэмдэглэсэн Хутагтын захидлын нооргийг Элчин сайд Мотоногоос орчуулж, ирүүлсэн байна. Үүнд Хутагт нь Японтой худалдааны гэрээг байгуулж, түүний тусламжийг олж, Хятадын Засгийн газрыг хатуу ятгаж, Өвөр Монголын хил хязгаарт түүний цэргийг оруулахгүй байлгах, түүгээр монголчуудын хүсэл эрмэлзэл болох Дотоод, Гадаад Монголыг нэгтгэж, үндэс, угсаа шашныг бүтэн хамгаалахыг хүсэж үүний төлөө Япон улсын Засгийн газраас бүрэн эрхт төлөөлөгчийг Монголд томилон ирүүлэхийг хүссэн гэжээ.

Энэ удаа Бээжинд суугаа дөрвөн консулын яаманд явуулсан дээр тэмдэглэсэн Монголын Засгийн газрын захидал гэгч нь Эзэн хаанд хаягласан Хутагтын захидалтай их төлөв адил хэмээн таамагламой.

Энэ удаа ирүүлсэн захидлын хэргийг Хятадад суугаа Англи (Франц, Герман, Америк) улсын консулаас Англи (Франц, Герман, Америк) улсын Засгийн газарт мэдэгдсэн явдал бий. Тиймээс та бололцоотой цагт тус улсын Засгийн газраас түүний агуулга болон ирүүлсэн захидалд тус улсын Засгийн газар ямар арга хэмжээ авсан тухай лавлаад дүнг нь мэдүүлэхийг хүснэ.

Баримт бичгийн дугаар 511

6 дугаар сарын 19-ны өдөр

Англи улсад суугаа элчин сайд Иноуэгээс Гадаад явдлын яамны сайд Катод

Монголын тухай Англи улсын Парламент дахь асуулт болон Гадаад явдлын яамны хариуг мэдүүлэх тухай

Тайшогийн 3 дугаар оны 6 дугаар сарын 19-ны өдөр

Англи улсад суугаа Онц бөгөөд бүрэн эрхт элчин сайд Иноуэ Кацуносукэ

Гадаад явдлын яамны сайд Барон Като Такаакид

Энэ сарын 16-ны өдөр Англи улсын Доод хуралд 1 гишүүнээс; Англи улсын Засгийн газар Хүрээнд албан ёсны төлөөлөгчийг томилон явуулах тухай Монголын албаныхнаас гуйсан явдал байна уу? Хэрэв байсан бол ямар хариу өгсөн бэ? Бас Хятадын Засгийн газарт монголчууд ямар статустай вэ? гэж асуусан байна.

Англи улсын Гадаад явдлын яамны сайд хариулахдаа:

- Монголын Засгийн газраас Англи улсын төлөөлөгчийг баяртай угтаж авах санаатай гэдгийг Англи улсын Засгийн газар албан бус шугамаар сонссон мэдсэн явдал бий. Харин Монголын Засгийн газар одоохондоо иймэрхүү албан ёсны асуулт тавих нөхцөл бүрдээгүй. Монгол болбоос одоо Хятадын сюзеренитетийн дор байгаа автономит улс юм хэмээн хариулжээ.

Тус хуралдааны протоколын товчийг хавсарган үүний тул мэдэгдэв.

Баримт бичиг Дугаар 513

6 дугаар сарын 30-ны өдөр

Хятадад суугаа консулын хэргийн түр хамаарагч Обатагаас Японы гадаад явдлын яамны сайд Катол

Энэ хэргийн тухай энэ сарын 10-ны өдрийн 167 тоот захидлаар надад заавар болгосныг хүлээн авлаа.

Энэ сарын 4-ны өдөр Англи улсын хамаарсан консул агсан Мацудари: Тус консулын яам хүлээн авсан Монголын Засгийн газрын захидлын агуулга нь нэгэнт 432 тоот бичигт бичсэн вангийн (Хутагтын –О.Б) доторхтой адил бөгөөд худалдааны гэрээ байгуулах тухай болон консул урих тухай байна. Тус консул routine ажил болгон өөрийн Засгийн газарт явуулах саналтай байна. Энэ хэргийг тусгайлан чухлаар үзсэн байдал ажиглагдахгүй байна.

Японы консул ийм захидал авсан эсэх, Японы Засгийн газар Өргөөд консулыг томилох санаа бий эсэхийг асуусан тул манай консулын яам энэ удаа ийм захидал хүлээн аваагүй боловч өмнө Орос улсын Засгийн газрын гараар дамжиж Хутагтаас Эзэн хаанд хаягласан захидлыг аваад чигээрээ буцаан өгсөн бас Консулыг томилон явуулах асуудлын тухайд Эзэнт гүрний Засгийн газрын саналыг үл мэдмүй. Миний хувийн бодлоор Орос улс Өргөөний Засгийн газар хоёрын харилцаа маш их деликат байдаг тул олон улсын тавцан дахь Монголын Засгийн

газрын статус нь гүйцэд тодорхой болохоос өмнө Эзэнт гүрний Засгийн газар ямар ч ийм арга хэмжээ авахыг бодохгүй байх хэмээн ярьжээ. Тэгэхэд тус консул нь үнэхээр санаа нэгтэй байна. Англи улсын Засгийн газар бас нэгэн адил бололтой гэжээ.

Дараа нь энэ сарын 18-ны өдөр Франц улсын консултай уулзсан дашрамд энэ хэргийн талаар асуусанд тус консулын яаманд Монголын Засгийн газраас 2 захидал (нэг агуулгатай) ирж, нэг нь Консулын яаманд хаяглаж, нөгөө нэгийг Франц улсын Засгийн газарт хаягласан байна. Эдгээрийн нэгийг нэгэнт Франц улсын Гадаад явдлын яаманд явуулсан гэжээ. Бас Франц улсын Засгийн газар Франц улс болбоос Монголд ашиг сонирхол байхгүй бөгөөд тус орон дахь Оросын улсын онцгой статусыг харгалзан энэ удаа Монголын Засгийн газрын саналд ямар ч анхаарал тавихгүй хэмээн итгэнэ. Харин би өөрийн улсын Засгийн газарт захидлыг явуулсанд Засгийн газар энэ хэрэгтэй холбогдуулан ямар ч бодитой арга хэмжээ авахгүй байх гэж би итгэж байна гэж нэмж бичиж явуулжээ.

Би нөгөө нэг захидлыг шууд pigeonhole хийсэн хэмээн инээмсэглэлээ. Бас захидлын агуулга нь нэгэнт ил болсон агуулгатай адил хэмээн ярьжээ.

6 дугаар сарын 26-ны өдөр Америк улсын консулын яамны 1 дүгээр нарийн бичгийн дарга Макмаллей надад хэлсэн газарт; Тус консулын яамны хүлээн авсан захидлын (2 хувь) агуулга нь:

Монголын тусгаар тогтносон учир шалтгааныг дурьдаж, нэгэнт Орос улстай Худалдааны гэрээ байгуулсан тухай мэдэгдэж, одоо Америкийн Засгийн газар бас консулыг томилон ирүүлж, Худалдааны гэрээ байгуулахыг хүснэ хэмээн бичив.

Бас Монголын Засгийн газарт гадаад хэлийг мэдэх хүн байхгүй тул томилон ирүүлэх консул нь монгол хэл буюу хятад хэлэнд нэвтэрсэн хүн байвал таарамжтай хэмээн хавсарган бичсэн байна гэжээ.

Тус консулын яам энэ хэргийг чухлаар үзэхгүйгээр 2 захидлын дотроос 1 хувийг өөрийн улсын Засгийн газарт илгээсэн гэжээ.

6 дугаар сарын 27 ны өдөр

Германы консулын яамны 2 дугаар нарийн бичгийн дарга Барон Лидзер нарийн бичгийн дарга Мацударигийн асуултад хариулахдаа:

Тус консулын яаманд ч Монголын Засгийн газраас 2 хувь захидал (агуулга адил) хүлээн авсан боловч тус захидал консулын яаманд хүрэхээс нэг долоо хоногийн өмнө нэг Германы худалдаачин Монголоос Тяньжинд эгж ирээд энэ удаагийн захидалтай адил агуулгатай бөгөөд ямар ч албан тамгагүй захидлыг тус газрын Германы консулын яаманд өргөн барьсан байна. Тус захидлын дотор өмнө захидлыг явуулсан боловч хариу аваагүй байгааг харамсан дурьдсанаас гадна Монголын

тусгаар тогтносон болон Орос улстай худалдааны гэрээ байгуулж гүйцээсэн тухай тэмдэглээд Монголын албаныхантай хэлэлцээ хийх чадалтай чадвартныг Өргөөнд томилон ирүүлж гэрээг байгуулан Худалдааны харилцаагаа тогтоохыг хүссэн тухай тэмдэглэсэн байна гэжээ. Харин энэ захидлын дотор Америк улсын консулын яаманд хаягласан захидлаас ялгаатай нь монгол хэл буюу хятад хэлэнд нэвтэрсэн хүнийг томилон ирүүлэхийг гуйсан байдаг нь байхгүй байна. Энэ консулын яамдал хаягласан захидал аль нь ч Монголоор бичсэн захидалд хятад орчуулгыг хавсаргасан гэх байдал Германы консулын яаманд хаягласан захидалд хятад орчуулгыг хавсаргасангүй, харин герман орчуулгыг хавсаргаж ирүүлсэн гэжээ.

Үүнийг бодоход холбогдсон герман хүнээр орчуулуулсан бололтой байна. Лидер тус захидал 1 хувийг нэгэнт Германы Засгийн газарт явуулсан бөгөөд Герман нь Монгол оронд тодорхой хэмжээгээр худалдааны ашиг сонирхолтой тул яваандаа тус улсын Засгийн газраас энэ хэрэгт нухацтай хандах цаг ирж магадгүй боловч одоохондоо яаралтай арга хэмжээ авбал зохих асуудал бус хэмээн ярьжээ.

Энэ явдал болбоос Франц улсын консулаас зүгээр инээд болгож байсан байдалтай харьцуулахад бага ялгаатай тал байгааг анхаарвал зохино. Иймийн тул Консулын яамдал ирүүлсэн захидал нь орчуулгын агуулгад бага зөрүүтэй боловч их төлөв нэг агуулгатай юм шиг байна. Тиймээс энэ жилийн 3 дугаар сарын 18-ны өдөр 72 тоот Таны бичгээр ирүүлсэн Хутагтаас манай Эзэн хаанд өргөн барьсан захидалтай их төлөв ижил агуулгатай хэмээн таамагламой гэжээ.

Баримт бичиг дугаар 514

7 дугаар сарын 1 ны өдөр

Герман улсад суугаа элчин сайдыг тур хамаарсан Шиноногоос Гадаад явдлын яамны сайд Катод явуулсан цахилгаан мэдээ 69 тоот

6 дугаар сарын 11-ны өдрийн 32 дугаар тоот таны захидалтай холбогдож 6 дугаар сарын 30-ны өдөр дипломаттай уулзах завшаанаар Гадаад явдлын яамны дэд сайдаас лавлан асуулаа.

Монголын Засгийн газар Хятадад суугаа Герман улсын консулд захидлаа явуулж, найрамдал, худалдааны гэрээг байгуулахын төлөө зохих элчийг томилж илгээхийг хүсэх тухай асуусан боловч Монгол болбоос Хятадын эрхэн дор байдаг бөгөөд Хятадтай байгуулсан Худалдааны гэрээ Монголд ч адилаар хамрагдах тул Германы Засгийн газар одоохондоо Монголтой тусгайлан гэрээ байгуулах учрыг олохгүй байна. Тиймээс ямар ч хариу явуулахгүйгээр өнгөрүүлэх санаатай хэмээн хариуллаа. Монголын Засгийн газраас ирсэн захидлын орчуулгыг хойноос явуулав.

Дугаар 515

7 дугаар сарын 3-ны өдөр

Франц улсад суугаа Элчин сайд Ишигээс Гадаад явдлын яамны сайд Катод (Уг захидлыг 7 сарын 21-ны өдөр хүлээн авчээ)

Тайшогийн 3 дугаар он 7 дугаар сарын 3-ны өдөр

Франц улсад суугаа Онц бөгөөд бүрэн эрхт элчин сайд Барон Иши Кикужиру

Гадаад явдлын яамны сайд Барон Като Такаакид

Энэ хэргийн тухай өнгөрсөн сарын 11-ны өдөр 31 дүгээр тоот бичгээр Монголын Засгийн газраас ирсэн захидлын агуулга болон үүний хариуд Франц улсын Засгийн газраас авсан арга хэмжээг тандахыг зааварласан билээ. Үүнд:

Тус улсын Гадаад явдлын яамнаас лавлан асуулгажээ. Монголын Засгийн газрын асуусан асуулга нь Таны захидалд тэмдэглэсэн Мичисүки сурвалжлагчийн мэдээний ёсоор бөгөөд Франц улсын Засгийн газар нь Монгол болбоос тусгаар тогтносон улс бус бас Орос улстай байгуулсан гэрээтэй байдгийг харгалзан тус асуулгад ямар ч хариу явуулсангүй.

Дугаар 516

Герман улсад суугаа элчин сайдыг тур хамаарсан Шиноногоос Гадаад явдлын яамны сайд Барон Като Такаакид 24 тоот нууц (Уг захидлыг 7 дугаар сарын 25-нд авчээ)

Энэ хэргийн тухай 6 дугаар сарын 11-ны өдрийн нууц 32 тоот таны захидлаар үүрэг болгосныг хүлээн авав. Үүний тухай 6 дугаар сарын 30-ны өдөр дипломатуудыг хүлээн авах завшаанд тус улсын Гадаад явдлын яамны дэд сайдаас лавлан асуулаа. Түрүүн Монголын Засгийн газраас Германтай худалдааны гэрээг байгуулахын төлөө зохих элчийг Өргөөнд томилон ирүүлэхийг хүсэж, Хятадад суугаа Германы консулд асуулт ирүүлсэн боловч ирээдүйд Монголын байдал болон Хятад, Монголын хоорондын харилцаанд их хэмжээгээр өөрчлөлт гарсан тохиолдолд Монголтой гэрээ байгуулах явдал байхгүй ч биш, харин Германы Засгийн газар нь одоогийн Монголыг Хятадын эрхэн дор байж, Герман, Хятадын худалдааны гэрээ нь Монголд бас хүчинтэй хэмээн ойлгох тул одоохондоо Монголтой тусгайлан гэрээ байгуулах учрыг олохгүй байна. Монголоос ирүүлсэн захидалд ямар ч хариу явуулахгүй чигээрээ өнгөрүүлэх санаатай байгаа. Харин Германаас Монголын худалдааны байдлыг судлахын төлөө ирээдүйд хүнийг явуулах эсэх нь төсөөлөхөд бэрх боловч энэ бол энэ хэргийн худалдааны гэрээ байгуулах асуудалтай ямар ч хамаа байхгүй хэмээн хариулсан байна. Энэ тайлбарын товчийг нэгэнт өмнөх 69 тоот бичгээр мэдүүлжээ. Одоо Монголын Засгийн газраас Хятадад суугаа Германы

консулд хаягласан захидлын герман орчуулгыг олж авлаа. Тус бичгийн хуулбар болон япон хэлний давхар орчуулгыг энд явуулмой.

Бас Хятадад суугаа Германы консулаас Германы Засгийн газарт явуулсан мэдээллийн дотор Монголын Засгийн газраас ирүүлсэн энэ удаагийн захидал нь Германы консулын яамнаас гадна Хятадад суугаа Англи, Америк, Франц улсуудын консулын яамдад хүрч ирсэнгүй тухай дашрамд ярьсан тул үүнийг хамтаар танд мэдүүлэв. Уг захидлын эхийг хавсаргав.

Бээжинд буй Германы консулд явуулсан Монголын Засгийн газрын захидлын эх (японоор орчуулсан)

Дугаар 517

7 дугаар сарын 16-ны өдөр

Америк улсад суугаа Онц бөгөөд бүрэн эрх барих элчин сайд Чиндагаас Гадаад явдлын яамны сайд Катод (8 дугаар сарын 14-нд уг бичгийг хүлээн авчээ)

Өнгөрсөн сарын 11-ны өдөр нууц 42 тоот бичгээр надад үүрэг болгосон хэргийг хүлээн авав.

Өнөөдөр нарийн бичгийн дарга Мацукагаар Гадаад хэргийн төрийн департаментийн газраас асуулгыг асуусанд өнгөрсөн сарын 4-ны өдрийн цахилгаан мэдээгээр Хятадад суугаа Америкийн консулаас мэдүүлсэн нь

Монголын Өргөөгийн Хутагтаас шууд захидлыг (захидлын дотор таны (Японы Гадаад явдлын яамны сайдыг хэлж буй -О.Б) тэмдэглэсэн хамаарсан консул Мацударигийн цахилгааны мэдээнд тэмдэглэгдсэнтэй их төлөв адил) хүлээн авсан байна гэжээ. Үүний талаар ямар арга хэмжээ авах вэ гэж зааварлахыг хүссэн байна. Үүнд Сайд тус сарын 6-ны өдрийн цахилгаан мэдээгээр энэ захидлын доторх хүсэлтэд татгалзвал зохино гэж хариу явуулсан байна.

Энэ татгалзана гэдэг хариуг явуулах аргыг Хятадын Засгийн газартай зөвлөлдөнө үү гэж заавар өгчээ. Үүний тухай тухайн үед Америкт суугаа Хятадын консулаас бас сонссон тул энэ асуудлыг ярилцсан байна (консултай). Үүнийг тус консул тус сарын 12-ны өдөр Хятадын Засгийн газарт цахилгаан мэдээгээр мэдүүлсэн байна. Дээр дурьдсанчлан Хятадад суугаа Америкийн консулаас ирүүлсэн цахилгаан мэдээний доторх Хутагтын захидлын агуулга нь Хамаарсан консул Мацударигийн цахилгаан мэдээний дотор тэмдэглэсэнтэй их төлөв адил боловч Гадаад хэргийн яамнаас (Америкийн) нарийн бичгийн дарга Мацукад үзүүлсэн цахилгаан мэдээний доторх бичигтэй Хамаарсан консул Мацударигийн цахилгаан мэдээн доторх захидлын бага зөрүүг тэмдэглэвэл доорх мэт.

Хамаарсан консулын цахилгаан мэдээний дотор “Худалдааны гэрээг байгуулах хүсэлтэй” гэснийг “Худалдаа, найрамдлын гэрээ

байгуулах хүсэлтэй” гэжээ. Бас “консулыг” гэснийг “консул” эсвэл “бусад албаны хүнийг” гэсэн байна.

Бас “хэлэлцээ хийх эрхтэй консул эсвэл бусад албаны хүнийг Өргөөнд томилон ирүүлэхийг хүснэ” гэсний өмнө “Монголын Засгийн газар Оросын Засгийн газартай байгуулсан гэрээний ёсоор бусад улсуудад бас Орост олгосонтой адил эрхийг олгох эрхийг хадгална” гэж байна.

Дугаар 518

7 дугаар сарын 21-ны өдөр

Англи улсад суугаа Элчин сайд Иноуэгээс Гадаад явдлын яамны сайд Катод нууц 40 тоот

Монгол улсын Засгийн газраас Худалдааны гэрээ байгуулах тухай Хятадад суугаа Англи улсын консулын яаманд явуулсан асуултын агуулга болон ирүүлсэн захидалд Английн Засгийн газраас ямар арга хэмжээ авсаныг Засгийн газрынхнаас асууж дүнгээ мэдүүл хэмээн өнгөрсөн сарын 11-ны өдөр нууц 43 тоот бичгээр зааварласныг хүлээн авлаа.

Үүнд энэ сарын 2-ны өдөр нарийн бичгийн дарга Ёшидаг Гадаад явдлын яаманд явуулж, Грегули хэмээх хүнээс асуулгалаа. Тэгэхэд тус хүн түүний агуулгыг тодорхой санахгүй боловч таны заасан захидал одоо Гадаад явдлын яамны сайдын гарт бий. Үүнд ямар арга хэмжээ авахын тухайд одоо ямар ч шийдвэр гараагүй, шийд гармагц захидлын агуулгатай хамт мэдүүлнэ гэсэн байна. Өнөөдөр тус түшмэлээс сонссон нь энэ хэрэг нь Түвдтэй холбогдох тул Гадаад явдлын яамнаас бус Энэтхэгийн яаманд илүү холбогдол бүхий тул тус захидлыг Энэтхэгийн яаманд шилжүүлсэн бөгөөд манай яам энэ хэргийн тухай одоо Энэтхэгийн түшмэлтэй хэлэлцэж буй. Тиймээс шийд гаргал тодорхой хугацаа шаардагдах төлөвтэй байна гэжээ. Үүнийг тус ноёноос мэдээ ирмэгц танд мэдүүлэх болно.

Дугаар 519

8 дугаар сарын 17-ны өдөр

Гадаад явдлын яамны сайд Катогоос Хятадад суугаа консулын хэргийг түр хамарсан Обатад нууц 268 тоот

Энэ хэргийн тухай Таны суусан улсын Засгийн газраас яаж хандаж байгааг лавлан асууж дүнгээ мэдүүлэхийг нэгэнт Англи, Франц, Америк, Герман улсад суугаа элчинд заавар явуулав. Үүний тухай Герман улсын Засгийн газар “Монгол болбоос хэвээр Хятадын бүгд найрамдах улсын эрхийн дор харьяалагдаж байдаг бөгөөд Герман, Хятадын худалдааны гэрээ Монголд бас нэгэн адил хүчинтэй байна хэмээн ойлгох тул одоо тусгайлан Монголтой гэрээ байгуулах учрыг олохгүй байна. Тиймээс Монголын Засгийн газрын иймэрхүү захидалд ямар ч хариу явуулахгүй

байх санаатай байна” гэсэн бөгөөд бас Франц улсын Засгийн газар “Монголыг тусгаар тогтносон улс биш бөгөөд Орос, Монголын хооронд гэрээ байдаг явдлыг харгалзан энэ удаа ирүүлсэн захидалд ямар ч хариу явуулахгүй” байхаар шийджээ. Америк улсын Засгийн газар Хятадад суугаа тус улсын консулд Монголоос ирсэн энэ хүслийг татгалзах тухай болон хариу явуулах аргыг Хятадын Засгийн газартай зөвлөлдөх тухай зааварласан байна. Тус бүрийн элчин сайдаас ийм хариу авлаа. Англи улсын Засгийн газрын арга хэмжээг Англи улсад суугаа Элчин сайдаас дараа мэдүүлмэгц хойноос танд мэдүүлэх болно гэжээ.

Дугаар 520

8 дугаар сарын 27-ны өдөр

Гадаад явдлын яамны сайд Катогоос Хятадад суугаа консул Хиокид нууц 282 дугаар тоот

Энэ хэргийн тухай Франц, Герман, Америкт суугаа элчин сайдуудаас хариу мэдээ ирсэн тухай энэ жилийн 8 дугаар сарын 18-ны өдрийн нууц 268 тоот бичгээр мэдүүлсэн байна. Англи улсаас энэ хэрэгт авсан арга хэмжээний тухай мөнөөхөн элчин сайд Иноуэгээс мэдээлжээ. Үүнд тус улс энэ хэргийн талаар авах арга хэмжээг шийдээгүй боловч шийдмэгц Монголын Засгийн газрын захидлын агуулгатай хамт даруйхнаа мэдүүлнэ. Энэ хэрэг болбоос Түвдтэй холбоотой тул Энэтхэгийн яаманд шилжжээ. Тус яам нь одоо Энэтхэгийн түшмэлтэй хэлэлцэж байгаа тул шийд гартал тодорхой хугацаа шаардагдах төлөвтэй байна гэжээ.

ИШЛЭЛ, ЗҮҮЛТ

7. Нихон Гаико буншо. Таишогийн хоёрдугаар он Нэгдүгээр боть 730 дахь тал
8. Үндэсний төв архив ф.А4., д.1, х.н. “XX зууны Монголын түүхийн эх сурвалж (1911-1921)” Баримт бичгийн эмхтгэл., УБ., 2003 он, 258 дахь тал
9. Англи улсыг хэлжээ.
10. Франц улсыг хэлжээ.
11. Nakami Tatsuo Independent Mongolia and the Imperialist Powers; 1911- 1914, - Journal of Asian and African Studies, No.17, 1979